

16/02/2005

Melayu sia-siakan peluang kuasai bahasa Inggeris

Oleh A HADI SALLEH

BANYAK yang diperkatakan mengenai ketidakupayaan pelajar Melayu menguasai bahasa Inggeris. Akibatnya, ramai pegawai kerajaan, guru Bahasa Inggeris, pendidik hatta diplomat kita ada yang tiada kemahiran dan kecekapan dalam bahasa antarabangsa itu.

Lantas kenyataan Datuk Mustafa Mohamad mengenai guru yang Bahasa Inggeris tidak dapat menguasai bahasa itu dengan baik bahkan ada yang mengajarnya dalam loghat Kelantan bukan sesuatu yang mengejutkan.

Cadangan bekas Perdana Menteri, Tun Dr Mahathir Mohamed memperkenalkan pengajaran Bahasa Inggeris untuk Sains dan Matematik sebelum ini ditentang hebat tetapi sebenarnya untuk kebaikan bangsa Melayu.

Pelajar di universiti juga gagal menguasai bahasa Inggeris walaupun belajar bahasa itu sejak dari tadika.

Kini ramai pelajar yang mengikuti kursus Bahasa Inggeris anjuran Universiti Teknologi Mara. Namun ada yang belajar sambil lewa walaupun mereka menanggung sendiri kos kursus itu. Mereka nampaknya bersemangat pada awal semester dan mula layu dan ponteng kelas pada pertengahan semester.

Bagaimana mereka dapat menguasai bahasa Inggeris dengan baik kalau bersikap seperti itu?

Apakah punca kelemahan menguasai bahasa Inggeris? Sebab terpenting ialah sikap pelajar yang kurang berinteraksi, tidak bergaul, kurang membaca dan tiada sifat suka mengharungi cabaran serta malu membuat kesilapan lantas mencari jalan mudah dengan tidak menggunakan bahasa itu kecuali apabila terdesak.

Ada pelajar kita di luar negara juga tidak menggunakan peluang itu untuk menguasai bahasa Inggeris dengan cemerlang.

Pelajar Melayu lebih senang tinggal sesama sendiri dan ke sana ke mari bersama rakan sekampung, malah lebih senang menggunakan loghat negeri masing-masing.

Oleh itu, mereka tidak fasih berbahasa Inggeris walaupun bertahun tinggal di luar negara. Maka apabila mengajar di tanah air keluarlah bahasa Inggeris loghat Kelantan.

Saya mencadangkan mereka diberi kursus dan latihan semula di luar Kelantan agar dapat mengembalikan intonasi dan sebutan bahasa Inggeris mengikut piawaian sebenar.

A HADI SALLEH,

Melaka.

(END) Source : Berita Harian